

- प्रधानमंत्री नरेंद्र मोदी होरें नमीं दिल्ली च चिल्ली दे राष्ट्रपति हुंदे नै गल्लकत्थ कीती, आपदा प्रबंधन ते सांस्कृतिक आदान-प्रदान जनेहू मुख समझौतें कन्नै तगड़े सरबंधें लेई कीती बत्त पदरी।
- राज्यसभा नै जहाज उपकरणें च हितें दी सुरक्षा विधेयक 2025 पारित करी दित्ता ऐ।
- मच्छी उत्पादन ते मछेरें दी औंदन बधाने लेई हीले कीते जा'रदे न- आखेआ केंद्री मंत्री राजीव रंजन सिंह होरें।
- कल लोकसभा च “वक्फ संशोधन बिल 2025” दे पारित होने पर विचार कीता जाग।
- म्यांमां भूचालै च मरोने आहलें दी गिनतरी 2 जहार 719 होई गेई ऐ। बचाऽ अभियान ब्रह्मा पूरें जोरें-शोरें कन्नै चला'रदा ऐ।
- अमरीका, अमरीकी माल समेयान पर किराया लाने आहले सब्भनें मुलखें पर टैरिफ दी घोषणा करी सकदा ऐ।

<><><><><><>

PM-Chile Talks

भारत ते चिल्ली नै अज्ज आपदा प्रबंधन ते सांस्कृतिक आदान-प्रदान च सहयोग लेई समझौतें पर दस्तखत कीते। दौनें पक्खें अंटार्कटिक सहयोग पर आयश पत्र दा बी लैन-देन कीता। प्रधानमंत्री नरेंद्र मोदी होरें अज्ज नमीं दिल्ली च चिल्ली दे राष्ट्रपति ग्रेबियल बोरिक फॉन्ट हुंदे कन्नै भारत चिल्ली सरबंधें दे सब्भनें पहलुएं पर गल्लकत्थ कीती। विशेष करियै दक्खिया सरबंधें गी तगड़ा करने लेई नमिं पैहलकदमिं पर गल्ल होई जेदे च इक सक्षम व्यापक आर्थिक भ्याली समझौता बी शामिल हा। दौनें लीडरें महत्वै आहले खनिजें दे खेत्तर, खाद्य सुरक्षा, डिजिटल ढांचे दे विकास, अक्षय उर्जा ते आयुर्वेद दे खेत्तरें च आपसी सहयोग गी केंद्र च रक्खियै गल्लबात कीती। अपने इक प्रेस बयान च प्रधानमंत्री मोदी होरें आखेआ जे राष्ट्रपति बोरिक होरें अंटार्कटिक जाने गित्तै चिल्ली गी इक महत्वै आहला द्वार दस्सेआ ते प्रधानमंत्री नरेंद्र मोदी होरें गी चिल्ली दे दौरे लेई साह्वा दित्ता। उनें दस्सेआ जे दौनें धड़ें अंटार्कटिक च रलिये शोध करने दे मुख खेत्तरें बारै इक सहयोग समझौते पर बी दस्तखत कीते।

<><><><><><>

RS Aircrafts Bills

राज्यसभा नै एयरक्राफ्ट आब्जेक्ट्स बिल 2025 गी पारित करी दित्ता ऐ। इस बिल च मोबाइल उपकरणें च अंतरराष्ट्री हितें सरबंधी कन्वेंशन गी कनूनी तौरा पर लागू करने दी कोशश कीती गेई ऐ। इस बिल च केंद्र सरकार गी कन्वेंशन ते प्रोटोकॉल दे प्रावधानें गी लागू करने लेई नियम बनाने दा अधिकार बी दित्ता गेदा ऐ। कनून च डायरेक्टोरेट जनरल ऑफ सिविल एविएशन गी कन्वेंशन दे उद्देश्यें लेई रजिस्ट्री प्राधिकरण दे तौरा उप्पर नामित कीता गेआ ऐ। रजिस्ट्री प्राधिकरण विमानें दे

रजिस्ट्रेशन ते डी-रजिस्ट्रेशन लेई जिम्मेदार ऐ। इस बिल बारै चर्चा दा परता दिंदे होई नागरिक उड्डयन मंत्री राम मोहन नायडू होरें आखेआ जे भारत दुनिया दा त्रीआ बड्डा घरेलू नागरिक उड्डयन बजार ऐ।

<><><><><><>

Shivraj Fertilizer

केंद्री राईबाई सरबंधी मंत्री शिवराज सिंह चौहान होरें अज्ज आखेआ ऐ जे अंतरराष्ट्री बजार च खाद दी कीमतें च बादा होने दे बावजूद करसानें गी सरकार आसेआ सस्ती कीमतें उप्पर सब्सिडी आहली खाद उपलब्ध करोआई गई ऐ। उनें आखेआ जे खाद खेतीबाडी लेई बडी जरूरी ऐ ते सरकार नै खाद दी कीमतें दी जांच लेई उपाय कीते न। उनें दस्सेआ जे करसानें गी यूरिया बैग 266 रपे प्रति बैग 266 रपे प्रति बैग दे तौरा उप्पर उपलब्ध करोआया जा'रदा ऐ। उनें आखेआ जे करसानें दी भलाई इस सरकार दे डीएनए च ऐ। उनें एहू बी आखेआ जे इस बरे दे बजट च कृषि खेत्तर लेई रिकार्ड बजटीय आबंटन कीता गेआ ऐ।

<><><><><><>

LG-GoC Meet

राइजिंग स्टार कोर दे जीओसी लेफ्टिनेंट जनरल Rajan Sharawat होरें उपराज्यपाल मनोज सिन्हा हुंदे कन्नै मलाटी करिए खित्ते दी मौजूदा सुरक्षा स्थिति कन्नै जुड़े दे महत्वपूर्ण पैहलुएं पर चर्चा कीती। इस दौरान सुरक्षा सरबंधी मामलें ते खित्ते च शांति ते स्थिरता बनाई रखने लेई रणनीतिएं गी मजबूत करने पर चर्चा होई। इस मौके टाइगर डिविजन दे जीओसी मेजर जनरल मुकेश भानवाला होर बी मौजूद हे। इस चर्चा दा मुख मकसद सुरक्षाबलें ते प्रशासन बश्कार तालमेल गी बदाना ऐ तां जे पैदा होई सकने आहली चुनौतिएं कन्नै कारगर ढंगै सिर निब्वड़ेआ जाई सकै।

<><><><><><>

White Knight Corps Command

लेफ्टिनेंट जनरल पी.के मिश्रा होरें व्हाइट नाइट कोर दे प्रमुख दे तौर पर कमान संभाली ऐ। ओहू लेफ्टिनेंट जनरल नवीन सचदेवा हुंदी थाहर आए न। सोशल मीडिया दी इक पोस्ट च रक्षा जन संपर्क अधिकारी जम्मू नै दस्सेआ जे जनरल मिश्रा होरें कर्मिएं गी संबोधित कीता ते कम्मै कारवाइएं दौरान उच्च मानकें गी बनाई रखने ते खित्ते दी सुरक्षा ते स्थिरता गी बनाई रखने लेई बचनबद्ध रौहने लेई गलाया। उनें बलें दी महत्वपूर्ण भूमिका पर बी लोऽ पाई।

<><><><><><>

Lok Sabha Fishiries

केंद्री मच्छी, पशु पालन ते डेयरी मंत्री राजीव रंजन सिंह होरें आखेआ ऐ जे सरकार नै पिछले 10 बरें च करसानें दी भलाई लेई केई उपा कीते न। उनें आखेआ जे इनें गैंऽ कन्नै मुख्य च मच्छी पालन च बादा करने च मदाद थ्होई ऐ ते मच्छेरें दी आमदनी च होर बादा होआ ऐ। मंत्री होरें अज्ज लोकसभा च मच्छी पालन समुदाय गी पेश औने आहली परेशानिएं उप्पर ध्यान आहने दा जवाब दित्ता ह। श्री सिंह होरें आखेआ जे मच्छी पालन दे मामले च मुख्य हून दुए नम्बर पर ऐ। मच्छी पालन खेत्तर दी तरक्की लेई सरकार आसेआ कीते गेदे उपाएं उप्पर लो पांदे होई केंद्री मंत्री होरें आखेआ जे नरेंद्र मोदी

सरकार नै मच्छी पालन दा बक्खरा मैहकमा बनाया ऐ ते मुख च ब्लू रेवल्यूशन गी बढावा देने लेई कम्म कीता ऐ।

<><><><><><>

Waqf. Rijju

वक्फ संशोधन बिल 2025 कल लोकसभा च विचार लेई पारित होने लेई औग। अज्ज संसद भवन च मीडिया आहलें कन्नै गल्लबात करदे होई संसदीय मामलें दे मंत्री ते अल्पसंख्यक मामलें दे मंत्रालय दा प्रभार बी संभालने आहले किरण रिजिजू होरें आखेआ जे इस बिल उप्पर सदन च 8 घंटे दी चर्चा करने दा फैसला कीता गेआ ऐ। उनें आखेआ जे कारोबारी सलाहकार समिति दी बैठक दुरान इस गल्ला उप्पर सहमति जताई गेई ही जे सदन दा रौं दिक्खने मगरा चर्चा दा समां बधाया जाई सकदा ऐ।

<><><><><><>

LG-SMVD

उपराज्यपाल मनोज सिन्हा होरें श्री माता वैष्णो देवी श्राइन च अज्ज मत्था टेकेआ ते केंद्र शासित प्रदेश दे लोकें दी शांति, खुशहाली ते भलाई-बेहतरी दी कामना कीती। चैत्र नरातें दे शुरू थ्वां लेइए अजें तगर इक्क लक्ख थ्वां बद्द श्रद्धालु पवित्र गुफा च मत्था टेकी चुके देन। श्रद्धालुएं दे भारी रश गी दिखदे होई सुरक्षा दे पुख्ता बंदोबस्त कीते गेदे न, जेदे च सी.सी.टी.वी कैमरे, ड्रोन वगैरा शामिल ऐ, तां जे श्रद्धालुएं दी सुरक्षा यकीनी बनी सकै।

<><><><><><>

SMVD-Lockers

तोआई, जात्तरा दे तजुर्वे गी होर बेहतर करने लेई श्री माता वैष्णो देवी अस्थापन बोर्ड नै भवन च स्मार्ट लॉकर सेवा शुरू कीती ऐ। डिजिटल तरीके कन्नै चलने आहले एह लॉकर पूरी चाल्ली सुरक्षित न ते श्रद्धालुएं दा समेयान सुरक्षित ढंगसँ सिर रक्खेआ जाई सकदा ऐ। श्री माता वैष्णो देवी अस्थापन बोर्ड दे मुख कार्रकारी अधिकारी अंशुल गर्ग होरें दस्सेआ जे एह पहलकदमी श्रद्धालुएं दी सौख आस्तै दितती जा'रदी नेही सहूलत ऐ जेदे कन्नै श्रद्धालु अपने समेयान दी फिक्र छोड़ियै पूरा ध्यान अपनी आध्यत्मिक जात्तरा बल लाई सकदे न।

<><><><><><>

India-Japan Space Dialouge

त्रीया भारत-जपान अंतरिक्ष संवाद अज्ज टोक्यो च आयोजित कीता गेआ। इस संवाद च अंतरिक्ष थमां सरबन्धत मंत्रालयें ते एजेंसिएं हिस्सा लैता। इस संवाद दा मकसद अपनी-अपनी अंतरिक्ष नीति ते प्राथमिकताएं पर विचारें दा आदान-प्रदान करने लेई इक्क मंच प्रदान करना ह। संवाद दौरान राष्ट्रीय अंतरिक्ष कार्यक्रमें, दपक्खी अंतरिक्ष सहयोग, अंतरिक्ष स्थितिक जागरूकता, अंतरिक्ष सुरक्षा, क्वाड अंतरिक्ष सहयोग, उद्योग स्तरीय सहयोग ते वाणिज्यिक अंतरिक्ष सहयोग पर चर्चा कीती गेई। भारतीय प्रतिनिधिमंडल दा नेतृत्व विदेश मंत्रालय दे निरस्त्रीकरण ते अंतरराष्ट्री सुरक्षा मामलें दे संयुक्त सचिव मुआनपुई सैया ते भारती अंतरिक्ष अनुसंधान संगठन-इसरो दे वैज्ञानिक सचिव

एम.गणेश पिल्लई होरें कीता। जापानी प्रतिनिधिमंडल दा नेतृत्व अंतरिक्ष नीति दे प्रभारी सहायक मंत्री (दूतावास) सैटा युकियो ते राष्ट्रीय अंतरिक्ष नीति सचिवालय दे महानिदेशक, काज़ेकी जून होरें कीता।

<><><><><><>

Malashia-Fire Incident

मलेशिया दी राजधानी कुआलालंपुर दे कश सरकारी उर्जा कंपनी पेट्रोनास आसेआ संचालित गैस पाइपलाइन च अग्न लगने करी 100 शा मते लोक घायल होई गए। खबरें मूजब करीब 60 लोकें दे फकोने ते होर तकलीकें कारणें उनेंगी अस्पताल च भर्ती करवाया गेआ ऐ। सेलंगोर राज्य दे अग्निशमन अधिकारिएं दस्सेआ जे करीब 500 मीटर तोड़ी फैली दी गैस पाइपलाइन लीक होने करी एहू अग्न लग्गी। उनें दस्सेआ जे प्रभावित पाइपलाइन दे वाल्व गी बंद करी दित्ता गेआ ऐ। इस अग्नू करी घटोघट्ट 49 मकानें गी बी नुकसान पुज्जा ऐ।

<><><><><><>

Mayanmar

म्यामां च पिछले हफ्ते आए दे विनाशकारी भूकंप च मरने आहलें दी गिनतरी 2 ज्हार 700 थमां बढ़ होई गई ऐ। उत्थूं दे वरिष्ठ जनरल मिन आंग हलाइंग नै अपने टेलीवीजन संबोधन च दस्सेआ जे इस शक्तिशाली भूकंप च मरने आहलें दी संख्या 2 ज्हार 729 तोड़ी पुज्जी गई ऐ ते एहू गिनतरी त्रै ज्हार थमां बढ़ होने दी मेद ऐ। उनें दस्सेआ जे चार ज्हार 521 लोक घायल होए न ते 441 अजें तोड़ी लापता न। शुक्रवार गी म्यामां दे मांडले इलाके च 7 दशमलव 7 तीव्रता दा भूकंप आया हा। एहूदे किश मिनटें बाद 6 दशमलव 4 तीव्रता दा इक्क होर झटका लग्गा जेदे कन्नै कई देशें च भारी नकसान होआ। बचाऽ अभियान ब्रह्मा पूरे जोरा-शोरै कन्नै चला'रदा ऐ।

<><><><><><>

World US New Tariff

अमरीका दे राष्ट्रपति डोनाल्ड ट्रम्प अमरीकी चीजें-बस्तें पर किराया लाने आहले सब्भनें देशें पर टैरिफ दी घोषणा करने आहले न। राष्ट्रपति ट्रम्प होरें कल संवाददाताएं कन्नै गल्लबात च इसी आयात ते निर्यात दे मामले च अमरीका लेई मुक्ति दिवस दस्सेआ। दुनिया भरै दे देशें गी अमरीका दी टैरिफ सरबन्धी महत्वै आहलिएं घोषणाएं दी निहालप ऐ। राष्ट्रपति ट्रम्प आसेआ आपें चें गै टैरिफ लाने कन्नै देशें दी निर्यात आधारित अर्थ बवस्थाएं गी चुनौती दा सामना करना पौगं नमें किरायें दी घोषणा कन्नै प्रमुख देशें दे आर्थिक विकास पर असर पौने दा खदशा ऐ। राष्ट्रपति ट्रम्प हुंदी संरक्षण वादी नीतिएं कन्नै मैक्सीको, कनाडा ते यूरोपीय संघ दे कन्नोकन्नी एशियाई देश बी प्रभावित होडन।

<><><><><><>

Kathua-Searches

कठुआ जिले च आतंकवादिएं गी फगड़ने लेई व्यापक तपाशी अभियान जारी ऐ। कल रातीं सुरक्षाबलें ते आतंकवादिएं बश्कार गोलीबारी होई ही। एहू गोलीबारी कठुआ जिले दे पंजीतीर्थी इलाके च होई। सुरक्षाबलें संदिग्ध त्रै आतंकवादिएं गी अपने घेरे च लेई लैता, मगरा दौनें बश्कार भारी गोलीबारी होई। पुलस महानिदेशक नलिन प्रभात, आई.जी.पी भीम सेना तूती ते होर दुए वरिष्ठ अधिकारिएं

चला'रदे अभियान आहली थाहर दा दौरा लाया। आतंकवादिएं गी फगड़ने लेई हैलीकाप्टरें, ड्रोन, खोजी कुत्ते ते कमांडो गी बी लाया गेआ ऐ। अभियान अजें बी जारी ऐ ते होर ब्यौरे गी बलगेआ जा'रदा ऐ।

<><><><><><>

CM-Bus Services

महिला सशक्तिकरण आहली भेठा इक गेंऽ तैहत मुख्मन्त्री उमर अब्दुल्ला होरें श्रीनगर दे शेर-ए-कश्मीर अंतरराष्ट्रीय कन्वेंशन सेंटर च महिलाएं लेई मुफ्त बस सेवा दी शुरूआत कीती। इस गल्ला दी घोषणा बजट च कीती गेई ही। एहू गेंऽ ऐ महिलाएं गी सुरक्षित ते पुज्ज आहली यातायात सेवा उपलब्ध करोआना। इस गेंऽ कन्नै कम्मकाजी महिलाएं, विद्यार्थिं ऐ ते होरनें दुई महिलाएं गी लाहू हासिल होग। एहू मुफ्त सेवा सरकारी बसें ते स्मार्ट सिटी बसें च उपलब्ध ऐ।

<><><><><><>

LG-Odisha

उपराज्यपाल मनोज सिन्हा होरें राजभवन जम्मू च आयोजित ओडिशा दिवस सरबन्धी कार्यक्रम उत्कल दिवस च हिस्सा लैता। उनें ओडिशा दी समृद्ध संस्कृति, कला साहित्य, वास्तुकला ते रिवायतें गी उजागर कीता। उनें राज्य दे भारतीय लोक संस्कृति, खान-पान, उत्सव ते नृत्य च योगदान दी बी सिफत कीती।

<><><><><><>